

PELAJAR 5

REGANG JESUS

Lebuh maya Jesus diukum mati ngena chara digantung ba kayu regang, orang jai ngumbai sida udah munuh siko orang ti udah ngachau chara pengidup sida ti jai. Sida enda nemu pematu Jesus ba kayu regang nya siti ari atur Tuhan kenya ari dunya digaga.

A. TUHAN NEBUS SEMUA MENSIA ARI DOSA

Nengah pematu Anak Tunggal Allah Taala ba kayu regang, Pengaga Semua Utai, Tuhan Jesus Kristus udah nebus semua dosa mensia, pemedis enggau pemerinsa sida. Jesus mati ba kayu regang laban nganti kitai mensia ti idup ba dunya tu. Nerima Jesus ba pengidup kitai lalu ngaku Iya mati ba kayu regang, siti ari saut ti beguna kelebih agi ba semua utai ti dipeguna dalam pengidup kitai.

1. Tuhan nunjukka Pengering Iya Nengah Kayu Regang

“Nyadi pesan pasal pematu Kristus di atas regang, nya nadai reti ba sida ti nuju pengerusak; tang ba kitai ti udah dilepas ari ukum, iya nya kuasa Allah Taala.” (1 Kor. 1:18), peda mega ba Rome 1:16.

2. Tuhan Mandangka Pengerindu Iya Nengah Regang

“Tang Allah Taala udah mandang ka pengerindu iya ngagai kitai; iya nya lebh kitai agi orang bedosa, Kristus mati ketegal kitai.” (Rm 5:8).

3. Tuhan Mai Pemerisa Kitai Ba Kayu Regang

“Tang Iya nat ka pemerinsa ti endang patut enggi kitai, pemedis ti ending patut di-empu kitai. Ngelama tu kitai ngumbai Iya kena pemerinsa ketegal ukum Allah Taala.” (Isa 53:4).

4. Jesus Nebus Ukum Dosa Ba Kayu Regang

“Tang Iya telih laban dosa kitai dipalu laban pengawa jai ti dikerja kita. Ukum ti ditetat ka Iya udah ngelepas ka kitai, kitai suman laban pemedis Iya. Semua kitai baka bedus ti lenyau, genap iko kitai niti jalai diri empu. Lalu Tuhan ngaga ukum ti ninggang Iya, ukum ti patut ninggang semua kitai.” (Isa 53:5,6). Peda mega ba 1 Peter 2:24.

B. KAUL TI BARU ENGGAU TUHAN NENGAH KAYU REGANG

Laban Tuhan tuchi sereta kudus, dosa udah nyerara kitai ari Iya. Nya alai nadai siko orang ti bedosa dalam ati sida ulih ngasaika pemisi Tuhan ba pengidup sida. Nyadi regang Jesus ukai semina meri kitai ngelala Iya tang mega ngasuh kitai ngasaika pengerindu, pengelantang enggau selamat lebh kitai idup lalu bisi kaul enggau Iya.

1. Kitai Dikemendar Ka Ba Mua Tuhan Nengah Regang Jesus

“Kristus endang nadai bedosa, tang ketegal kitai Allah Taala ngasuh Iya nyadi piring penyalah kitai, awak ka kitai deka bempu pengelurus Allah Taala dalam Iya” (2 Kor 5:21).

2. Kitai Diampun Nengah Regang Jesus

“Iya udah ngelepas ka kitai ari kuasa pemetang, lalu mai kitai enggau likun ngagai perintah Anak ti dikerindu Iya, ulih darah Iya kitai ditebus, reti nya, samua penyalah kitai di-ampun magang” (Kol. 1:13,14). Peda mega ba 1 John 2:1,2.

3. Nengah Regang, kitai nyadi raban dalam ruang bilik Tuhan

“Iya nuchi mensia ari dosa sida, lalu Iya enggau semua sida ti di-asuh tuchi, sama bempu Apai. Nya kebuah Jesus enda malu ngumbai sida menyadi Iya. Munyi ko Iya, ‘Allah Taala, aku deka ngenang pasal nuan ngagai sida menyadi aku; aku deka muji nuan ba mua orang mayuh ti gempuru” (Heb. 2:11,12). Peda mega ba John 1:12.

4. Dinding ti nyerara mensia ari pangan diri dirubuh nengah regang

“Tang diatu, ulih besaum enggau Jesus kristus, kita ti dulu diau jauh, udah dibai semak ulih darah Kristus. Laban Kristus empu endang pemaik kitai, bepun ari pengawa Iya ti mai orang Judah enggau bansa bukai bebaik. Ngena tubuh Iya empu, Iya udah ngerubuh ka kota ti nyerara sida lalu ngasuh sida bemunsuh enggau pangan diri. Iya muai Adat orang Judah ngena pesan sereta enggau adat iya, awak ka mai dua bengkah bansa nyadi siti bansa ti baru dalam iya empu, ari nya ngaga pemaik. Ngena pematIya di atas regang Kristus madam ka dengki ati; ulih regang Iya ngempung sida nyadi satubuh lalu mai sida bebaik enggau Allah Taala” (Ef. 2:13-16).

C. DILEPAS NENGAH REGANG JESUS

Pemati Jesus ba kayu regang siti ari pemenang besai ka kitai mensia. Laban Tuhan nebus semua dosa kitai ba kayu regang, reti nya mega semua penusah enggau pemerinsa iya ti bepun ari dosa mati ba kayu regang. Regang Tuhan udah mai pemenang ti ngelepaska ka kitai!

1. Dilepaska Ari Sitan

“Lalu ba regang nya Kristus ngelepas ka diri ari kuasa antu enggau kuasa ti merintah; Iya ngasuh sida dipeda orang mayuh, ulih ngiring sida baka orang tangkap dalam pejalai pemenang sida” (Kol. 2:15), peda mega ba Kolosi 1:13.

2. Dilepaska Ari Semua Dosa Ti Dulu Suba

“Enti Anak ngelepas ka kita, reti nya kita amat dilepas” (John 8:36). Peda mega ba Kolosi 2:13.

3. Dilepaska Ari Semua Dosa ke diatu

“Dosa enda tau agi merintah kita; kita enda idup diperintah Adat, tang ulih pengasih Allah Taala” (Rm 6:14).

4. Dilepaska Ari Mayuh Macham Penyakit

“Iya ngaga kereja nya kena ngamat ka jaku nabi Isaiah, ti madah ka, ‘Iya empu nat ka pemerinsa ti endang patut enggi kitai, pemedis ti endang patut di-empu kitai” (Mat 8:17).

5. Dilepaska Ari Sumpah

“Tang Kristus udah nebus kitai ari jaku sumpah ti dibai Adat, ulih Iya kena tinggang sumpah ketegal kitai; laban munyi ti disebut dalam Bup Kudus: ‘Barang orang ti kena gantung ba tiang kayu Iya kena sumpah Allah Taala” (Gal. 3:13). Peda mega ba Ulang Adat 28:15-68.

6. Dilepaska Ari Ukum

“Ketegal nya Iya enda tau enda suah nat ka pemerisa kenya ari penumbuh dunya. Tang diatu ba pengujung dunya, Iya udah pegari sekali aja, awak ka muai dosa ulih darah Iya empu ti nyadi ka gensenan. Genap iko orang enda tau enda mati sekali aja, udah nya lalu kena pechara ulih Allah Taala” (Heb. 9:26,27).

7. Dilepaska Ari Pemati Lalu Bulih Pengidup Ti Meruan

“Laban Allah Taala udah balat rindu ka dunya nya kebuah Iya meri Anak Tunggal Iya, awak ka genap iko orang ti arap ka Iya enda mati, tang tau bulih pengidup ti meruan” (John 3:16).

D. PENGERINDU ENGGAU PENGELURUS BETEMU BA KAYU REGANG

Kayu regang nya siti endur pengerindu Tuhan enggau Ukum Kudus Tuhan betemu. Ukum Kudus Iya nuntut pemati ka semua dosa-nengah darah iya ti siuh. Pengerindu Iya betemu lalu utai ti dituntut lebu may Jesus, Anak Tunggal Tuhan mati awak ka nebus dosa kitai.

“Tang Allah Taala udah mandang ka pengerindu iya ngagai kitai; iya nya lebu kitai agi orang bedosa, Kristus mati ketegal kitai! Ulih darah Iya kitai diatu digaga lurus di mua Allah Taala; lebih agi, kitai deka ulih Iya ari pengeringat Allah Taala. Dulu suba kitai munsuh Allah Taala, tang diatu kitai udah bebaik enggau Iya ulih pemati Anak Iya. Diatu laban kitai udah bebaik enggau Allah Taala, kitai lebih agi deka di-idup ka baru ulih pengidup Kristus! Tang ukai semina naka nya; kitai gaga ati dalam Allah Taala ulih Jesus Kristus Tuhan kitai, ti udah mai kitai bebaik enggau Allah Taala” (Rm 5:8-11).

E. REGANG NYADIKA PUN PENGINGAT LAMA

Regang Jesus Kristus nyadika batang penyadi mensia ba dunya tu. Lebu mensia ti terubah labuh ngagai dosa (peda ba Pemungkal 3), Tuhan ngaga pelin deka meri Jesus mati ba kayu regang.

Bepun ari may nya, mensia ngiga lalu mega arapka semina regang Kristus aja ti ulih nebus dosa mensia. Saritu kitai enda malik ke belakang agi tang lalu ngentapka pengarap kitai, Jesus udah ngaga semua nya ba atas kayu regang, lebu may kitai nerima pengampun lalu bulih pengidup baru.

KOMITMEN AKU

Saritu aku nyerahka seluruh pengarap aku ngagai utai ti udah digaga Tuhan ba kayu regang. Aku nerima pengampun ti disemaya ka ari pemati Jesus ba kayu regang. Aku mega beterima kasih ngagai Tuhan, ke kaul ti nyadi may diatu enggau Iya. Aku ngaga pemutus ati jam diatu ianya aku deka hidup setiap hari di dalam kaul enggau Tuhan lalu besemaya ngagai diri aku empu awakka magi pemendar tu mega ngagai orang bukai.